

TRX

Kerjasama tambah
nilai akses TRX **Ms.B2**



Kerjasama tambah nilai akses TRX

[FOTO HIASAN]



TRX meterai kerjasama strategik dengan MRT dan SMART tingkat sambungan daerah kewangan itu ke seluruh Kuala Lumpur.

➔ Jalin perjanjian strategik dengan MRT, SMART

Oleh **Shahrizan Salian**
shahrizan_salian@bh.com.my

TRX City Sdn Bhd, pemaju induk Tun Razak Exchange (TRX) memeterai kerjasama strategik bersama Mass Rapid Transit Corporation Sdn Bhd (MRT Corp) dan Stormwater Management and Road Tunnel Sdn Bhd (SMART) untuk meningkatkan sambungan daerah kewangan itu ke seluruh Kuala Lumpur.

Perjanjian TRX City bersama MRT Corp memberikan hak kepada pemaju infrastruktur pengangkutan itu membangunkan stesen bawah tanah dan terowong laluan rel di atas tanah di TRX, manakala

TRX City mengekalkan hak pembangunan akan datang seksyen di atas tanah.

“Perjanjian bersama ini bermakna MRT Corp dapat membawa masuk laluan ke dalam TRX tanpa perlu membeli plot, sambil membolehkan kami mengekalkan hak membangunkan lokasi amat strategik, sekali gus memanfaatkan jangkaan pertumbuhan masa depan,” kata Ketua Pegawai Eksekutif TRX City, Datuk Azmar Talib dalam satu kenyataan, semalam.

Lokasi penting

Stesen MRT Tun Razak Exchange adalah satu-satunya pertukaran antara Aliran Sungai Buloh-Kajang (SBK) dan Aliran Sungai Buloh-Serdang-Putrajaya (SSP) di Kuala Lumpur, lokasi penting bagi menjadikan daerah kewangan itu satu daripada pembangunan berorientasikan transit terbesar di ibu negara.

“TRX akan mendapat manfaat daripada bukan hanya satu, malah dua aliran MRT. Sambungan dan

akses cemerlang pembangunan ini akan diperoleh dengan menghubungkannya secara langsung dengan rangkaian rel bandar, sudah pastinya mengukuhkan peranannya sebagai daerah kewangan kelas dunia,” kata Ketua Pegawai Eksekutif MRT Corp, Datuk Seri Shahril Mokhtar.

Sementara itu, perjanjian TRX City bersama SMART membabitkan pertukaran tanah dan penempatan semula depoh penyelenggaraan SMART ke lokasi baharu di TRX.

Dalam masa sama, TRX akan mendapat akses terus ke terowong SMART, menyediakan sambungan jalan ke koridor selatan Greater KL, termasuk kawasan seperti Cheras, Seri Kembangan dan Sungai Besi.

“Kami gembira bekerjasama dengan TRX City untuk terus meningkatkan infrastruktur trafik di Greater KL. SMART akan bekerjasama erat dengan TRX untuk melicinkan proses penempatan semula,” kata Ketua Pegawai Operasi SMART, Sharifah Alauyah Wan Othman.